

У Нишу пречитани „Студентски едикт”

На студентским простесту у Нишу, 1. марта пречитани и текст документа котри наволани „Студентски едикт”. Документ котри симболизує Милански едикт котри принесени 313. року з котрим успоставена вирска равноправносц у Римским царстве и з котрим застановене преганяне християнох, а праве Ниш и место дзе народзени римски цар Константин Вельки.

Студентски едикт визначує вредносци за котри ше студенти бора и яку державу и систему би любели мац, и составени є зоз шлїдуючих осем елементох:

**I О ШЛЕБОДИ** Сербия жем шлебодних людзох. Шлебода не милосц, але основне право неодвоїве од достоїнства каждого граждана. Шлебода фундамент нашого демократского дружтва, наших законох, наших словох и наших думкох.

**II О ДЕРЖАВИ** Держава заєдніцке добро шицких ей гражданох. Институції Сербії муша служиц народу и буц фундамент довирия, а не инструмент моци поєдинцох. Закладаме ше за державу у котрей закон представя верховни авторитет и дзе политична функция значи службу гражданом, а не привилегию.

**III О ПРАВДИ** Правда основа стабилного дружтва. Независне судство, шлебодни медиї и институції муша діловац по закону, а не под политичним прициском. Єднакосц правох муши буц стварносц за каждого граждана Сербії.

**IV О МЛАДОСЦИ** Млади указали же су не лем нашлїдніки Сербії, але ей уставобранителе. Студенти як ношители тей борби, чуваю вредносци на треба же би почивало нашо дружтво. Младосц Се4рбії гледа систему засновану на труду и знаню.

**V О ДОСТОЇНСТВЕ** Закладаме ше за дружтво у котрим ше почитує достоїнство каждого поєдинца. Достоїнство подрозумює же ані єдна особа не будзе приведзена до положеня понїженя пре свойо становиска и думаня. Сербия у котрей фаховци не подценени и дзе ше знанє вреднує вецей як послухносц, дзе млади видза надїю у своєї жеми.

**VI О ЗНАНЮ** Знанє фундамент напредку каждого дружтве. Гледаме Сербию котра уклада до науки, вигледованя, образованя и култури як приоритетох свойого розвою.

Університети муша буц независни центри винітковитосци, а не полигони за куповане дипломах и политичних уплівох.

**VII О СОЛИДАРНОСЦИ** Драги наших городох, од Ниша до Нового Саду, од Београду до Крагуєвцу, шведоча о моци народного єдинства. Тота солидарносц, до тераз непозната системом котри засновани на роздзельованю, постава наш завит и наша моц котру будземе браніц и пестовац. Претвараюци поєдинєчни гласи до сили пременкох, доказали зме же Сербия не множество подзелених интересох, але заєдніца гражданох котри дзеля визию будучносци.

**VIII О БУДУЧНОСЦИ** Най тот едикт будзе наша обовязка, наша обецунка єдни другим – же будземе будовац державу котра припада шицким, у котрей кажде дзецо годно шніц вельки сни. Держава у котрей правда и шлебода буду моцнейши од було хторого поєдинца, у котрей ше власц не будзе служиц з народом, але вона будзе служиц народу.